

9. Per illum, RAGHUIDARUM præstantissimum, terræ principes ortum æque atque occasum nanciscebantur : ille enim jussum non transgredientibus amicus, sed corde æneo erat in repugnantes.

10. Arcu intenso armatus, uno curru debellabat ille terram, oceano cinctam, atque exercitus ejus, elephantos et equos celerrimos habens, non nisi victoriam illius renuntiabat.

11. Ipsa maria, nubium instar tonantia, tympana fiebant, promulgantia victoriam illius, KUVERÆ instar fortunati, qui arcum gestans uno curru, scirpea munito, terram subegerat.

12. INDRAS fulmine acuto vincebat montium partes, sibi infestas ; ille vero, cujus vultus recenti loto similis erat, arcu sonante, sagittarum imbres emittente, hostium partes.

13. Centeni reges illius, indomita vi præditi, pedes tangebant radiis gemmarum, diademata sua ornantium, illius pedum pulchritudine magis etiam splendentibus, deorum instar, INDRAM adorantium.

14. Venia data hostium uxoribus, comæ ornatu privatis, quarum infantes ab illius comitibus suppliciter manus jungere edocti fuerant, ab oceani litore rediit ad urbem suam, *Alaka* haud inferiorem.

15. Quamquam ipse orbis terrarum centrum occupaverat, neque ullus alius rex alba umbella instructus erat, tamen ille, ignem lunamque splendore æquans, insegnis erat, simulac regis alicujus terram invictam remanere audiret.

16. Ab illo, qui brachiis suis omnium regionum divitias accumulaverat, et in sacrificiis diadema suum deponebat, *Tamasæ* et *Sarayis* fluminum ripæ, altis aureis postibus sacrificialibus splendentes, tenebris liberæ reddebantur.

17. Erat ille SIVAS, qui, inhabitans corpus, cærimoniis lustratum, capreæ pelle baculoque instructum, *kusa* cinctum, vocem retinens, dorcadis cornu manu tenens, splendore incomparabili illud fulgere faciebat.

18. Balneo sacro purgatus, sensibus restrictis, dignus qui ipsum deorum cœtum ingrederetur, ille pluentem NAMUCHIS hostem caput elatum inclinare fecit.

19. Dea lotum gestans, marito addicta, quemnam alium regem coluit,